

Jahresbericht der Präsidentin 2018

Eigentlich dünkt's mi, i heg gar nid Zyt, iz ä Jahresbricht z'schriebe übers 2018, sött i doch soviu plane fürs 2019.....

Aber für ne churze Blick zrüggs ufs Vereinsjahr 2018 muesses iz rasch länge.

GV im 2018 isch ä churze Chut u es schöns binander si gsi. I ha nach der GV gueti Gspräch chönne führe u so sogar scho fasch es nöis Vorstandsmitglied chönne gwinne. Speziell isch o gsi, as mir Nicole Sutter hei dörfe zum Ehremitglied vom SGV Büren a. A. wähle.

A der 1. Vorstandssitzig heimer wieder enisch über üses Archiv gred. Mir hei gwüsst, as mer bir Sandra Bègré use müesse, da Sie Büre leider verloht het. I bi so frech gsi u ha das scho ar GV vom TV erwähnt u i die grossi Rundi gfragt, ob nid öpper es Plätzli hät. U tatsächlech het sech churz druf abe dr Rolf Wälti gmeldet u mir hei üses neue Archiv am Aareweg chönne bezieh. So, i hoffe, ds Thema Archiv i de nächschte Jahresbrichte nüm müesse / dörfe z'erwähne.....

Im Juni isch de ds Turnfest u dr Jugendturntag in Biel ir Tissot Arena uf em Programm gstande. Alles het a eim Wuchenendi stattgunde u es het guet klappet. Trotzdem isches nid die gliichi Stimmig gsi i dere Alag, wie weme nöime ufemne Feld isch.

Am Freitagabend si bereits üsi Einzel-Turner u –Turnerinnen gstartet. Im K5 heimer es bsunders schöns Bild dörfe gniesse! Z gsamte Podest isch vom SGV Büre bsetzt gsi u im K6 heimer d'Siegerin chönne fiere.

Am Samstag het när üsi VGT Gruppe is Wettkampfschehe igriffe mit ihrem neue Ring Programm.

Am Jugendturntag isch z' GETU erneut sehr erfolgreich im 3teilige Vereinswettkampf mit emne neue Bode- und em Sprungprogramm sowie dr Pendelstafette aträtte. U o z' GETU Jugend-Team hets wieder ufs Podest gschafft!

Gnaueres über die super Leistige, wo i würclech stolz bi druf, chöit dir uf üsere Website i de Jahresberichte vo de jewilige Gruppe nachelese.

Am 5. Juli hei mir üs zum traditionelle Brätle ufem Helvetiaplatz troffe. Ds Wetter het guet mitgschpiut - wie fasch immer i däm schöne sehr trochne Summer 2018. Ganz vieli vo üsne Mitglieder hei dr Weg ufe Helvetiaplatz gfunge. Es si feini Dessert mit-bracht worde u es isch e super gmüetliche Abe worde.

A de Vorstandssitzige heimer wie immer verschiedeneni Gschäft behandelt u viu diskutiert. O Zämäsetzig vom Vorstand isch immer wieder es Thema. U da ja d'Alana het akündet gha, dass Sie im Vorstand Endi 2018 zrügtritt heimer sofort Lena Lauper agfragt u nach ä chli Bedenkzyt het Sie üs erfreulicherwies zuegseit u sech oscho super igschaffet ! Merci Lena !

Im Vorstand regle mer ging, wer geit a wele Alass? Bruche mer neus Material? D'Abenunterhaltig git immer viu z'rede, da ja all die Ressort müesse bsetzt si, damit alles ribigslos louft. Ar Leiterinnesitzig im Oktober erfahre mer, wies i de einzelne Gruppe vom SGV so louft.

Mir dörfe stolz sie uf das Agebot, wo mir chöi biete mit dene super Leiter u Leiterinne, wo üs scho sit Jahre zur Verfüegig stöh!

D' Abendunterhaltung 2018 isch ungerem Thema „Wasserwelt“ ufem Programm gstande.

Leider heimer ir Wuche vorher ä tragische Todesfall us der Turnerfamilie müesse beklage, was natürlech uf die ganzi Abeungerhaltig uswürkige gha het. Trotzdem muess i säge, bi i beeidrukt gsi wie alles klappet het u die ganzi Turnerfamilie vo Büre zämägstande isch.

D' Zusammenarbeit mit allne üsne Häufer und Häuferinnen und em TV het wüchlech guet klappet u die verschiedene Programme si guet bim Publikum acho!

A derä Stelle dank i üsne Leiterinne und Programmverantwortliche herzlich für die schöne Programm. I erwähne gern d'Erika Beutler, d'Sybille Fuhrmann, d'Natascha Beutler, dr Lukas Kummer u ds Chrigi Basler sowie d'Leitercrew vom Gräteturne. Es isch wüchlech nid selbstverständlich, dass öpper so viu Zyt u Herzbluet i de wichtig Alass für Büre investiert.

Merci!

Afangs Dezember ischs GETU de no ad Schwyzermeisterschaft „Vereinsgräteturne Jugend“ nach Kreuzlinge u isch doch mit dem Reck vo de Chliene tatsächlich ufem 3. Platz glandet.

Ohni mini Lüt im Vorstand gieng i üsem Verein nid viu. Mir si zum Glück es super Team u es isch wüchlech schön für mi z wüsse, dass i mi auf jedes Vorstandsmitglied cha verla. Es ziehe alli am glische Strick u jedes zeigt Isatz, wos nötig isch u möglich.

Ar Michèle Lauper, danke ich speziell für ihre Isatz. Sie entlastet mi sehr u nimmt mer so viel wie möglech Sache ab u geit a Sitzige! Merci viu mau Michèle.

Zämäarbeit mit em TV funktioniert wüchlech sehr gut. Am meiste heimer weg der Abendunterhaltig mitenand ztue. Und ade Fritige wemer üs d'Halle teile 😊 Mir gö a ihri GV u so berchöme mir alli wichtige Informatione. Ideal isch o, dass dr Lukas Kummer i beidne Vorständ isch u so immer wieder wichtigs cha ibringe.

I hoffe die Kontäkt bliebe so offe u ehrlich, wiu so fägts.

Zum Schluss dank i o allne üsne Vereinsmitglieder für ihres Vertraue, wo sie em Vorstand entgäge bringe. Mir freue üs über jede Zuewachs i de Turngruppe u interessiere üs für euchi Alige!

Fürs neuä Vereinsjahr wünsche i euch u eune Familie gueti Gsundheit u vieli schöni, tolli u lustigi Momente mitenang!!!

Rüti, im Februar 2019 eui Präsidentin Sarah Dasen